





**NUTI MEITAKI
NO KO I TE ATUA!**



Te puapinga o teia poroutia:

Ka tauturu teia poroutia ia koe kia mataora i te apii mei roto mai i te Tuatua a te Atua, te Pipiria. Te akaari maira te au irava i te openga o te au parakarapa tataki tai i te ngai ka tatau koe i roto i taau Pipiria i te au pauanga ki te au uianga tei akatouia.

Ia koe e tatau ra i te au irava i roto i te Pipiria, akamanako ana akapeea te reira me pau i teia au uianga. Ka mataora tetai o te Au Kite o Iehova i te tauturu ia koe kia kite i te aiteanga o te au Tuatua Tapu.  *E tatau ia Luka 24:32, 45.*

Akapeea koe me kimi i tetai irava i roto i taau Pipiria?

Te akakite maira te ingoa o te puka e ko teea **puka** Pipiria taau ka kimi.

Te akakite maira te numero e ko teea **pene** taau ka kimi.

 *E tatau ia Ioane 17:3.*

Te akakite maira te numero me kore au numero e aru maira e ko teea **irava me kore au irava** taau ka tatau.

IOANE 16:33—17:24

e tumatetenga to kotou i teiane i ao: ka akamaroiroi ra, kua riro te re o teiane i ao iaku.”

17 E kia akaoti akerā Iesu i teiane i tuatua anga, kua nānā akera ona mata ki runga i te rangi, na ko atura, E taku Metua, kua tae ki te ora; ka akakakā i taau Tamaiti, kia akakakā katoa oki taau Tamaiti ia koe. **2** Kua oronga mai oki koe i te mana nona ki te tangata katoa nei, kia oronga atu aia i te ora mutu kore i te aronga katoa taau i oronga mai nona ra.

3 Teia oki te ora mutu kore, kia kite ratou ia koe i te Atua mou ra, e ia Iesu i te Mesia, i taau i tono maira. **4** Kua akakakā au ia koe i te ao nei: kua oti iaku te angaanga

Nuti Meitaki no ko i te Atua!
Good News From God!
Nenei Anga o Peperuare 2019
Rarotongā (fg-RA)

© 2012
WATCH TOWER BIBLE AND TRACT
SOCIETY OF PENNSYLVANIA

Aronga Nenei
Watchtower Bible and Tract Society of
New York, Inc., Wallkill, New York, U.S.A.
Made in Japan

Kare teia poroutia e oko. I orongaia mai ei tuanga no tetai angaanga apii Pipiria i te ao katoa, turuia e te tauturu oronga ua.

Me oronga i te tauturu, aere ki te www.jw.org.

Te au taiku anga Tuatua Tapu no roto mai i te Pipiria i te reo Kuki Airani, urianga 1888. Me kare i akakiteia atu, te ngai i akaaria te *NW* i muri i tetai taiku anga, te akakite maira e no roto mai i te urianga o teia tuatua o te *New World Translation of the Holy Scriptures*.


Photo Credits: Page 6, top, Dead Sea Scroll: Shrine of the Book, Photo © The Israel Museum, Jerusalem; page 6, middle, and page 32, upper right, Greek Codex: From *The Codex Alexandrinus in Reduced Photographic Facsimile*, 1909, by permission of the British Library; page 16, Hitler: Based on U.S. National Archives photo

Akakiteanga: Pouroa te au puka tei taikuia i roto i teia poroutia na te Au Kite o Iehova i nenei.


Eaa ra te Nuti Meitaki?

1

1. Eaa ra te nuti meitaki no ko mai i te Atua?


Inangaro te Atua kia mataora te au tangata i te oraanga i te enua nei. Kua anga aia i te enua e te au mea ravarai no tona inangaro i te au tangata. Kare e roa atu ka oronga mai aia i tetai oraanga meitaki atu a te tuatau ki mua no te au tangata i te au pa enua ravarai. Ka akaora mai aia i te au tangata mei te mamae.  *E tatau ia Ieremia 29:11.*

Kare i rauka ana i te au kavamani i te akakore atu i te takino anga, te maki, me kore te mate. Inara, e nuti meitaki tetai. Kare e roa atu ka mono te Atua i te au kavamani a te tangata ki tona uaorai kavamani. Ka mataora tona iti tangata i te kite i te au e te oraanga kopapa meitaki.

 *E tatau ia Isaia 25:8; 33:24; Daniela 2:44.*


2. Eaa ka rapurapuia ai te nuti meitaki?

Ka ope te mamae me takore te Atua i te aronga kino mei te enua nei. (Zephania 2:3) Aea te reira e tupu ei? Kua totou te Tuatua a te Atua i te au turanga te takino ra i te au tangata i teia tuatau. Te akaari maira te au mea e tupu ra i te enua nei e kua waitata te tuatau ka takore te Atua i te kino.

 *E tatau ia 2 Timoteo 3:1-5.*

3. Eaa ta tatou ka rave?

E apii tatou no runga i te Atua na roto i tana Tuatua, te Pipiria. Mei tetai reta rai te reira no ko mai i tetai metua aroa. Te akakite maira te reira e akapeea tatou e mataora ai i tetai oraanga meitaki atu i teiane e tetai oraanga mutu kore a te tuatau ki mua i te enua nei. Penei kare tetai pae e inangaro ia koe kia tauturuia kia marama i te Pipiria. Kare rava tatou e inangaro kia ngere tatou i teia oraanga meitaki atu a te tuatau ki mua.


 *E tatau ia Maseli 29:25; Apokalupo 14:6, 7.*



2


Koai ra te Atua?

1. Eaa ra tatou ka akamori ei i te Atua?

Ko te Atua mou Tei Anga mai i te au mea katoatoa. Kare ona akamataanga e kare ona openga. (Salamo 90:2) Nana i oronga mai i te tuatua meitaki i roto i te Pipiria. (1 Timoteo 1:11) I te mea e na te Atua i oronga mai i te ora no tatou, ka anoanoia tatou kia akamori iaia anake ua.  *E tataua ia Apokalupo 4:11.*

2. Mei teaa ra te tu o te Atua?


Kare rava tetai tangata i kite ana i te Atua no te mea e Vaerua aia, te aiteanga e teitei atu aia i te au mea ora i te enua nei. (Ioane 1:18; 4:24) Inara, ka kite tatou i to te Atua tu mei te au mea tana i anga mai. Ei akaraanga, te akakite maira te au ua rakau e te au tiare tukeke i tona tu aroa e te pakari. E te akakite maira te tu maatamaata o te ao katoa i tona mana.

 *E tataua ia Roma 1:20.*


Ka kite maata katoa atu tatou i to te Atua tu na te tataua anga i te Pipiria. Ei akaraanga, te akakite maira te reira i ta te Atua e mareka ra e tana kare e mareka ana, tana akono anga i te tangata, e tana ka rave i roto i te au turanga tukeke.

 *E tataua ia Salamo 103:7-10.*

3. E ingoa ainei to te Atua?

Kua tuatua a Iesu e: “E to matou Metua i te ao ra, Kia tapu toou *ingoa*.” (Mataio 6:9) Noatu e maata to te Atua au tao-onga, e tai rai ona ingoa. Tukeke me tuatuaia tona ingoa i roto i te au reo tatakai tai. I roto i te reo Rarotonga e tuatuaia ana te reira e ko “Iehova.”  *E tataua ia Salamo 83:18.*

Kua kiritiia te ingoa o te Atua mei roto mai i te au Pipiria e manganui e kua monoia te reira ki te ingoa Atua me kore Atua. Inara, i te tuatau i tataia ai te Pipiria, kua taikuia mai e 7,000 taime te ingoa o te Atua. Kua akakite a Iesu i to te Atua ingoa i tona apii anga i te au tangata no runga i te Atua.

 *E tataua ia Ioane 17:26.*

4. Te manako maira ainei a lehova ia tatou?

Ko te aiteanga ainei i mamae ei te au tangata e manganui e kare te Atua ko lehova e manako maira ia tatou? Te karanga ra tetai pae e te tamamae ra aia ia tatou no te mea te timata maira aia ia tatou, kare ra te reira e tika ana.

📖 *E tatau ia Iakobo 1:13.*

Kua oronga mai te Atua i te tu rangatira ki te au tangata. Kare ainei tatou e ariki rekareka ana i te tu rangatira kia tavini i te Atua? (Iosua 24:15) Inara e manganui tei iki i te rave i te au mea kino ki tetai ke, no reira i maata atu ei te mamae. Me kite mai a lehova i te tu tau kore, ka tamamae te reira iaia.

📖 *E tatau ia Genese 6:5, 6.*

E Atua a lehova te manako maira ia tatou. Inangaro aia kia mataora tatou i te oraanga. Kare e roa atu ka akakore aia i te mamae e te aronga e akatupu ra i te reira. E tumuanga meitaki tetai i akatika ei aia i te mamae no tetai tuatau poto ua. I roto i te Apiianga 8, ka apii tatou eaa taua tumu ra.

📖 *E tatau ia 2 Petero 2:9; 3:7, 13.*

5. Akapeea tatou me akavaitata atu ki te Atua?

Te pati maira a lehova ia tatou kia akavaitata atu kiaia na te tuatua anga kiaia na roto i te pure. Te manako maira aia ia tatou tatakai tai. (Salamo 65:2; 145:18) Kua papa aia i te akakore i ta tatou ara. Kua kite aia i ta tatou tautaanga kia akamareka iaia, noatu ka ara tatou i tetai au taime. Noatu e aronga apa ua tatou, ka rauka ia tatou tetai pirianga vaitata ki te Atua. 📖 *E tatau ia Salamo 103:12-14; Iakobo 4:8.*

I te mea e kua oronga mai a lehova i te ora no tatou, ka ano-anoia kia maata atu to tatou inangaro iaia i tetai ke. (Mareko 12:30) Ia koe e akaari ra i too inangaro no te Atua na te apii maata anga no runga iaia e te rave anga i tana e pati maira, ka akapiri vaitata atu koe kiaia.

📖 *E tatau ia 1 Timoteo 2:4; 1 Ioane 5:3.*


Mei teia metua
aroa rai, te
rave ra te Atua
i te mea meitaki
no tatou no te
tuatau roa




3


No ko Mai Tikai Ainei te Nuti Meitaki i te Atua?

1. Koai te Tumu Tata o te Pipiria?

Kua tataia i roto i te Pipiria te nuti meitaki e ka noo te au tangata ki te enua nei e tuataua ua atu. (Salamo 37:29) E 66 au puka rikiriki i roto i te Pipiria. Kua taangaanga te Atua e 40 tangata kia tata i te reira. Na Mose i tata i te nga puka mua e rima mei tetai 3,500 mataiti i topa. Na te apotetoro ko loane i tata i te puka openga tere atu i te 1,900 mataiti i topa. Noai te au manako ta te au tangata tata Pipiria i tata? Kua komunikeiti te Atua ki te au tangata tata Pipiria na roto i tona vaerua tapu. (2 Samuela 23:2) Kua tata ratou i to te Atua au manako, kare i to ratou uaorai. No reira ko lehova te Tumu Tata o te Pipiria.  E tataua ia 2 Timoteo 3:16; 2 Petero 1:20, 21.

2. Akapeea ra tatou i papu ei e te tika ra te Pipiria?

Kua kite tatou e no ko mai te Pipiria i te Atua no te mea te totou tika tikai maira te reira i te tuataua ki mua. Kare e rauka i tetai ua atu tangata i te rave i te reira. (Iosua 23:14) Ko te Atua Mana Katoatoa ua te kite tikai maira i te oraanga o te tangata no te tuataua ki mua.  E tataua ia Isaia 42:9; 46:10.

Ka irinaki atu tatou e kare e rauka kia akaaiteia atu ki te puka no ko mai i te Atua. E pirioni ua atu kopi o te Pipiria tei tua aerea i roto i te au anere reo. Noatu e puka taito te Pipiria, te rotai ra te reira ki te apianga taineti. Te aiteite katoa ra te manako o te aronga tata e 40 ki tetai e tetai.* Te tuatua katoa ra te Pipiria i to te Atua aroa, e ka rauka i te reira i te tau i te oraanga o te au tangata kia meitaki atu. Te akapapu ra teia ki te au mirioni tangata e ko te Pipiria te Tuatua a te Atua.  E tataua ia 1 Tesalonia 2:13.

* Akara i te poroutia *A Book for All People*.




3. Eaa te au manako o te Pipiria?

Te akakite maira te Pipiria i te nuti meitaki e e akakoroanga aroa to te Atua no te au tangata. Te akamarama maira te au Tuatua Tapu i te tumu i ngere ei te au tangata i te akameitaki-anga kia noo ki roto i tetai enua parataito i te akamataanga, e akapeea te parataito me akaoki akaouia mai.


 E tatau ia Apokalupo 21:4, 5.


Tei roto katoa i te Tuatua a te Atua te au ture, au kaveinga, e te au akoanga. Te akakite maira te Pipiria i ta te Atua i rave ki te au tangata tei rave i te au mea meitaki e te au mea kino. E ka kite mai tatou mei teia au akaraanga i te tu o te Atua. Inara, ka tauturu te Pipiria ia koe kia marama no runga i te Atua. Te akamarama maira te reira akapeea koe me riro mai ei oa nona.

 E tatau ia Salamo 19:7, 11; Iakobo 2:23; 4:8.

4. Akapeea koe e marama ai i te Pipiria?

Ka tauturu teia poroutia ia koe kia marama i te Pipiria na te taangaanga anga i ta Iesu i taangaanga ana. Kua taiku aia i te au irava Pipiria e kua akamarama i “te tuatua i tataia ra.”

 E tatau ia Luka 24:27, 45.

E meitaki atu te nuti meitaki no ko mai i te Atua i tetai atu au nuti ke. Inara, kare tetai aronga e reka ana i te reira, e e riri ana tetai pae i te reira. Auraka e maromaroa. Tei runga toou manakonakoanga no te ora mutu kore i toou marama anga no runga i te Atua.  E tatau ia Ioane 17:3.



4

Koai a Iesu Karaiti?

1. Akapeea to Iesu oraanga te akamata anga?

Kare a Iesu i aite ki tetai atu tangata, i noo ana aia ei angera i runga i te rangi i mua ake ka anauia mai ei aia ki te enua nei. (Ioane 8:23) Ko Iesu te mea mua ta te Atua i anga mai, e kua tauturu aia i te anga mai i te au mea katoatoa. Koia anake ua tei anga tikaia mai e Iehova, i kapikiia ai aia e ko te Tamaiti “anau tai” a te Atua. (Ioane 1:14) E Vaa Tuatua a Iesu no te Atua, no reira aia i kapiki katoaia ai e ko “te Logo.”

📖 *E tataua ia Maseli 8:22, 23, 30; Kolosa 1:15, 16.*

2. Eaa a Iesu i aere mai ei ki te enua nei?

Kua tonono mai te Atua i tana Tamaiti ki te enua nei na te tuku anga i tona oraanga ki roto i te vairanga tamariki o te paretania ngati Iuda, ko Maria. No reira kare to Iesu metua tane i te tangata. (Luka 1:30-35) Kua aere mai a Iesu ki te enua nei (1) kia apii i te tuatua mou no runga i te Atua, (2) kia akanoo i tetai akaraanga no tatou e akapeea me rave i to te Atua anoano noatu ka aro atu tatou i te au akaaooanga, e te (3) kia oronga i tona oraanga apa kore ei “oko.”

📖 *E tataua ia Mataio 20:28.*

3. Eaa tatou i anoano ei i tetai oko?

Ko te oko, e tutaki tei orongaia ei akamatara mai i tetai tangata mei te mate. (Exodo 21:29, 30) Kare te mate e te ruaine anga ei tuanga no ta te Atua akakoroanga mua no te tangata. Akapeea tatou i kite ei i te reira? Kua akakite te Atua ki te tangata mua ko Adamu e, me rave aia i ta te Pipiria i kapiki e ko te “ara,” ka mate aia. No reira, naringa a Adamu kare i ara, kare

rava aia e mate. (Genese 2:16, 17; 5:5) Kia tau ki ta te Pipiria, kua “o” mai te mate ki te au tangata na roto ia Adamu. E kua iri te ara a Adamu ki runga i tana uanga katoatoa ei utunga no te mate. No

Eaa te au tu tei akariro ia Iesu ei tangata oaoa?

—MATAIO 11:29;
MAREKO 10:13-16.



reira ka anoano tatou i tetai oko ei akamatara mai ia tatou mei te tuikaanga o te mate ta Adamu i tuku mai ki runga ia tatou.


 *E tatau ia Roma 5:12; 6:23.*

Koai te ka tutaki i te oko ei akamatara mai ia tatou mei te mate? Me mate tatou, kua tutaki tatou i ta tatou uarai ara. Kare rava e rauka i tetai tangata apa i te tutaki i te ara a tetai ke.

 *E tatau ia Salamo 49:7-9.*


4. Eaa a Iesu i mate ei?

Kare aia i aite kia tatou, e tangata apa kore a Iesu. No reira kare aia e anoania kia mate no tana au ara—kare aia i rave ana i tetai ara. Inara, kua mate a Iesu no te ara a tetai ke. Kua oronga mai te Atua i tana Tamaiti kia mate no tatou ei akaari i Tona aroa maata no te tangata. Kua akaari katoa a Iesu i te aroa no tatou na te akarongo anga ki tona Metua e te oronga anga i tona ora no ta tatou ara.

 *E tatau ia Ioane 3:16; Roma 5:18, 19.*


5. Eaa ta Iesu e rave ra i teianeii?

Iaia i te enua nei, kua rapakau a Iesu i te maki, kua akatu mai i tei mate, e kua akaora i te tangata mei roto i te kino. Kua akaari mai aia i tana ka rave a te tuatau ki mua no te au tangata akarongo. (Mataio 15:30, 31; Ioane 5:28) Muri ake i to Iesu mate anga, kua akaora mai te Atua iaia ei angera. (1 Petero 3:18) E kua noo a Iesu i te rima katau o te Atua e tae ua atu ki te tuatau ka oronga ai a Iehova i te mana kiaia kia tutara ei Ariki ki rungao i te enua katoa. (Ebera 10:12, 13) Teianeii te tutara ra a Iesu ei Ariki i te rangi, e te akakitekite nei tana au pipi i te enua nei i te tuatua meitaki i te ao katoa.

 *E tatau ia Daniela 7:13, 14; Mataio 24:14.*

Kare e roa atu, ka taangaanga a Iesu i tona mana ei Ariki i te takore atu i te mamae e te aronga e akatupu ra i te reira. Te aronga katoatoa tei irinaki ia Iesu e tei akarongo kiaia, ka mata-ora ratou i te noo i roto i te enua parataito.

 *E tatau ia Salamo 37:9-11.*



5

Eaa to te Atua Akakoroanga no te Enuua Nei?



1. Eaa ra te Atua i anga ai i te enua nei?

Kua oronga mai a Iehova i te enua no te au tangata ravarai. To tatou kainga te reira. No reira kare te nga tokorua mua ko Adamu raua ko Eva i angaia kia akaki i te rangi ki te tangata —kua anga ke ana te Atua i te au angera kia noo ki runga i te rangi. (Iobu 38:4, 7) Inara, kua tuku te Atua i te tangata mua ki roto i tetai parataito manea tikai tei kapikiia e ko te kainga i Edene. (Genese 2:15-17) Kua oronga a Iehova kiaia e tana uanga te manakonakoanga no tetai oraanga mataora i te enua nei e tuatau ua atu. *E tatau ia Salamo 37:29; 115:16.*

I te akamataanga, ko te kainga i Edene anake ua te parataito. Kua anoanoia te nga tokorua mua kia akaki i te enua ki ta raua uanga. Aere ua rai, ka akono raua i te enua katoa e ka akariro i te reira ei parataito. (Genese 1:28) Kare rava te enua e takoreia. Ka riro ua rai te reira ei kainga no te au tangata.

E tatau ia Salamo 104:5.

2. Eaa ra te enua kare i riro ei ei parataito i teiani?

Kare a Adamu raua ko Eva i akarongo ana ki te Atua e kua tuku atu a Iehova ia raua ki vao i taua kainga ra. Kua ngaro te parataito, e kare i rauka i tetai tangata i te akaoki akaou mai i te reira. Kua karanga te Pipiria e: “Kua orongaia te enua ki te rima o te aronga kino.”—Iobu 9:24.


E tatau ia Genese 3:23, 24.

Kua ngaropoina ainei ia Iehova tana akakoroanga mua no te au tangata? Kare! Koia te mana katoatoa. Ka akatupu rai aia i tana i akakoro. (Isaia 45:18) Ka akaoki akaou mai aia i te au tangata mei te tu rai tana i akakoro ana i mua ana.


E tatau ia Salamo 37:11, 34.


3. Akapeea te Parataito e akaoki akaouia mai ei?

Ka akaoki akaouia mai te Parataito ki te enua nei ia Iesu e tutara ra ei Ariki no te Atua. I roto i te tamaki i Aramakito, na Iesu e arataki i te au angera a te Atua e ka takore atu ratou i te


aronga katoatoa tei patoi i te Atua. E oti ka tapeka a Iesu ia Satani no tetai 1,000 mataiti. Ka akaoraia te iti tangata o te Atua mei te takoreanga no te mea na Iesu e arataki e e paruru ia ratou. Ka mataora ratou i tetai oraanga mutu kore i roto i te Parataito i te enua nei.  *E tatau ia Apokalupo 20:1-3; 21:3, 4.*

4. Aea te mamae e ope ei?

Aea te Atua e takore ei i te kino i te enua nei? Kua oronga mai a Iesu i te “akairo” e aea e waitata mai ei te openga. Te takino nei te au turanga o teia tuatau i te oraanga o te au tangata e te akaari maira e te noo nei tatou i “te openga o teiane i ao.”  *E tatau ia Mataio 24:3, 7-14, 21, 22.*

I te tuatau e tutara ra a Iesu e 1,000 mataiti i te rangi i runga ake i te enua, ka takore aia i te mamae. (Isaia 9:5, 6; 11:9) Iaia e tutara ra ei Ariki, ka rave a Iesu i tana angaanga ei Taunga Maata e ka takore aia i te au ara a te aronga e inangaro ra i te Atua. No reira, na roto ia Iesu, ka takore atu te Atua i te maki, te ruaine, e te mate.  *E tatau ia Isaia 25:8; 33:24.*

5. Koai ma te ka noo i roto i te Parataito a te tuatau ki mua?

Ka noo te aronga tei akarongo ki te Atua ki roto i te Parataito. (1 Ioane 2:17) Kua tono a Iesu i tana au pipi kia kimi i te aronga akaaka e kia apii ia ratou akapeea ratou e arikiia mai ei e te Atua. I teia tuatau, te akapapa nei a Iehova i te au mirioni tangata kia ora atu ki roto i te enua Parataito no te tuatau ki mua. (Zephania 2:3) I ko i te au Are Uipaanga Patireia o te Au Kite o Iehova, te apii ra te au tangata e akapeea me riro mai ei au tane e ei au metua tane meitaki atu, e ei au vaine e ei au metua vaine meitaki atu. Te akamori kapiti ra te au metua e te tamariki e te apii ra akapeea me puapingaia mei te tuatua meitaki.  *E tatau ia Mika 4:1-4.*



I ko i te Are Uipaanga Patireia, ka aravei koe i te aronga tei inangaro i te Atua e tei inangaro i te kite akapeea me akamareka iaia





6

Eaa te Manakonakoanga no Tei Mate?




1. Eaa te nuti meitaki no tei mate?


Tae anga a Iesu ki Betania vaitata atu kia Ierusalem, kua mate takere tona oa ko Lazaro e a ra. Kua aere atu a Iesu e Mareta raua ko Maria, te nga tuaine o te tangata tei mate, ki te ngai tanuanga. Kare i roa ana kua akaputuputu mai tetai urupu tangata. Te kite ra ainei koe i to Mareta e to Maria mataora te akatuakaou mai anga a Iesu ia Lazaro mei te mate?  *E tatau ia Ioane 11:21-24, 38-44.*

Kua kite ke ana a Mareta i te nuti meitaki no te aronga i mate. Kua kite aia e ka akatuakaou mai a Iehova i tei mate kia noo akaou ki runga i te enua nei.  *E tatau ia Iobu 14:14, 15.*

2. Eaa ra te turanga o tei mate?

Kua angaia mai te au tangata mei te one pueu. (Genese 2:7; 3:19) Kare e vaerua i roto ia tatou e kare e apinga i roto ia tatou e ora mai me mate tatou. Me mate tatou, kua mate rai to tatou roro, e kare to tatou manako e angaanga akaou. Kare a Lazaro i tuatua mai ana i tetai apinga i tona mate anga no te mea kare ana apinga i kite ana.


 *E tatau ia Salamo 146:4; Koheleta 9:5, 6, 10.*

E tamamae ana ainei te Atua i te tangata ki te ai me mate ratou? I te mea e kua akakite mai te Pipiria e kare tei mate e kite mai i tetai apinga, e apiianga pikikaa te ai tamamae anga te akakino ra i te Atua. E mea rikirika kiaia te manako anga i te tamamae i te tangata ki te ai.  *E tatau ia Ieremia 7:31.*

Kua akakite te Atua kia Adamu e: “E one-pueu oki koe, e ka riro akaou rai koe ei one-pueu.”


—GENESE 3:19.


3. Ka rauka ainei i tei mate kia tuatua mai kia tatou?

Kare tei mate e tuatua mai e e akarongo mai. (Salamo 115:17) Inara, e au angera kino tetai, penei ka tuatua mai ratou ki te tangata e ka akatutu mai ia ratou ei au tangata mate. (2 Petero 2:4) Te patoi pakari ra a lehova i te tuatua ki te aronga tei mate.  E tatau ia Deuteronomi 18:10, 11.

4. Koai ma te ka akaora akaouia mai?

Mirioni ua atu tangata tei mate ka akaora akaouia mai ki te enua nei. Ka akatuakaouia mai tetai aronga kare i kite ana i te Atua e tei rave ana i te au angaanga kino.

 E tatau ia Luka 23:43; Angaanga 24:15.

Ka apii te aronga tei akatuakaouia mai i te tuatua mou no runga i te Atua e ka irinaki ratou ia lesu e ka akarongo kiaia. (Apokalupo 20:11-13) Ka mataora te aronga te ka akaora akaouia mai e tei rave i te au mea meitaki i tetai oraanga mutu kore i te enua nei.  E tatau ia Ioane 5:28, 29.

5. Eaa ta te tuakaouanga e akakite maira no runga ia lehova?

Kua oronga mai te Atua i tetai manakonakoanga no tei mate na te tono mai anga i tana Tamaiti kia mate no tatou. No reira te akakite maira te tuakaouanga i to lehova aroa e tona aroa takinga meitaki. Me akaora akaouia mai tei mate, koai ma tikai taau e inangaro ra kia kite?


 E tatau ia Ioane 3:16; Roma 6:23.



7

Eaa te Patireia o te Atua?

1. Eaa te Patireia o te Atua?

E kavamani te Patireia o te Atua i runga i te rangi. Ka mono te reira i te au kavamani ravarai e ka akatupu te reira i te anoano o te Atua i te rangi e te enua nei. Meitaki tikai te au nuti no runga i te Patireia o te Atua. Kare e roa atu ka akamerengo te Patireia o te Atua i te au anoano o te tangata no tetai kavamani meitaki. Ka taokotai mai te reira i te au tangata e noo ra i te enua nei.  *E tatau ia Daniela 2:44; Mataio 6:9, 10; 24:14.*

E tutara ana tetai ariki i roto i te patireia. Kua iki a lehova i tana Tamaiti ko Iesu Karaiti ei Ariki no Tona Patireia.

 *E tatau ia Apokalupo 11:15.*

2. Eaa ra a Iesu i tau ei ei Ariki?

Ko te Tamaiti a te Atua te ka tau ei Ariki no te mea e tu takinga meitaki tona e e maroiroi aia i te rave i te mea tika. (Mataio 11:28-30) E e mana ririnui katoa tona i te tauturu i te


au tangata no te mea ka tutara aia i runga o te enua mei te rangi mai. Muri ake i tona akatuakaouia anga, kua oki atu aia ki te rangi e kua noo i te rima katau o lehova. (Ebera 10:12, 13) I te openga, kua oronga te Atua i te mana kiaia kia tutara.

 *E tatau ia Daniela 7:13, 14.*


Eaa a Iesu
ka tau ei
ei Ariki?

—MAREKO 1:40-42.

3. Koai ma te ka tutara kapiti kia Iesu?

Ko tetai pupu tei kapikiia e ko “te aronga tapu” te ka tutara kapiti kia Iesu i runga i te rangi. (Daniela 7:27) Ko te au apotero akarongo mou a Iesu te aronga tapu mua tei ikiia. Te iki nei rai a lehova i te au tane e te au vaine akarongo mou ei aronga tapu. Mei ia Iesu rai ka akatuakaouia mai ratou ei ko-papa vaerua.  *E tatau ia Ioane 14:1-3; 1 Korinetia 15:42-44.*




Eia tangata ka aere ki runga i te rangi? Kua kapiki a Iesu ia ratou e ko te “anana iti.” (Luka 12:32) Ka taeria to ratou numero ki te 144,000. Ka tutara kapiti ratou kia Iesu i runga o te enua.  *E tatau ia Apokalupo 14:1.*


4. Eaa tei tupu mai te akamataanga a Iesu i te tutara?

Kua tutara te Patireia o te Atua i te mataiti 1914.* Te mea mua ta Iesu i rave ei Ariki, te pei mai anga ia Satani e tana au temoni ki te enua nei. Kua riri tikai a Satani e kua akatupu i te au manamanata i te ao katoa. (Apokalupo 12:7-10, 12) Mei te reira taime mai, kua kino roa atu te au manamanata o te tangata. Ko te au tamaki, te onge, te maki mate e te ngaruerue enua e tuanga katoatoa te reira no te “akairo,” e kare e roa atu ana ka akaaere te Patireia i te au mea i te enua nei.

 *E tatau ia Luka 21:7, 10, 11, 31.*

5. Eaa ta te Patireia o te Atua ka akatupu?

Na roto i te angaanga tutuanga i te ao katoa, i taokotai mai ei te Patireia o te Atua i te urupu maata mei te au pa enua ravarai. Mirioni ua atu au tangata akaaka e turuturu ra ia Iesu. Ka paruru te Patireia o te Atua ia ratou me takore te reira i te akatereanga kino i te enua nei. No reira, kia apii te au tangata ravarai e inangaro ra kia puapingaia mei te Patireia o te Atua i te akarongo kia Iesu.  *E tatau ia Apokalupo 7:9, 14, 16, 17.*

I te tuatahi o te 1,000 mataiti, ka akatupu te Patireia i ta te Atua akakoroanga mua no te au tangata. Ka riro mai te enua ei parataito i te ao katoa. I te openga, ka oronga atu a Iesu i te Patireia ki tona Metua. (1 Korinetia 15:24-26) Kua kite ainei koe i tetahi tangata te inangaro ra koe i te akakite atu i te Patireia o te Atua?  *E tatau ia Salamo 37:10, 11, 29.*

* No tetahi atu au manako ta te totou Pipiria i totou mai no te mataiti 1914, akara i te kapi 217-220 o te puka *Eaa ta te Pipiria ka Apii Mai ia Tatou?*



8

Eaa ra te Atua i Akatika ai i te Kino e te Mamae Kia Tupu?



1. Akapeea te kino i akamata ai?

Akamata mai te kino i te enua nei to Satani pikikaa mua anga. E angera apa kore a Satani te akamataanga, inara, “kare aia i mou i te tuatua-mou.” (Ioane 8:44) Kua akatupu aia i te inangaro kia akamoriia aia tei tau anake ua ki te Atua. Kua pikikaa a Satani ki te vaine mua ko Eva, te akavare anga iaia kia akarongo kiaia, kare ki te Atua. Kua piri atu a Adamu kia Eva i te akarongo kore anga i te Atua. Kua tupu mai te mamae e te mate no ta Adamu i iki. E tataua ia *Genese 3:1-6, 19.*

Te akavare anga a Satani ia Eva kia akarongo kore ki te Atua, kua patoi aia i te turanga ngateitei o te Atua me kore tona tao-onga Teitei Rava Atua. Kua piri atu te maata anga o te tangata kia Satani i te patoi i te Atua ei Tutara no ratou. No reira kua riro mai a Satani ei ‘ariki me kore ei tutara no teianei ao.’

E tataua ia *Ioane 14:30; 1 Ioane 5:19.*

2. Kino ainei ta te Atua au mea i anga mai?

E apa kore te au angaanga ravarai a te Atua. Ka rauka i te au tangata e te au angera ta te Atua i anga mai i te akarongo kiaia ma te apa kore. (Deuteronomi 32:4, 5) Kua anga mai te Atua ia tatou kia rauka te tu rangatira kia iki i te rave i te mea meitaki e te mea kino. Kua oronga mai taua tu rangatira ra i te mataara kia akaari tatou i to tatou inangaro i te Atua.

E tataua ia *Iakobo 1:13-15; 1 Ioane 5:3.*

Kua roa te Atua i te akatika anga i te tangata kia tutara e kia akaari mai e kare e rauka ia ratou i te akatika-tika i te au manamanata o te tangata

3. Eaa ra te Atua i akatika ai i te mamae e tae ua mai ei ki teia tuatau?

No tetai tuatau poto, kua akatika a Iehova i tona turanga ngateitei kia patoia mai. No teaa ra? Ei akaari anga e kare tetai tutaraanga a te tangata e puapingaia me kare te Atua. (Kohelata 7:29; 8:9) Muri ake i te 6,000 mataiti o te tuatua enua o te

tangata, te kiteaia mai nei te au akapapuanga. Kare i rauka i te au tangata tutara i te takore atu i te tamaki, te au angaanga kino, te au tu tau kore me kore te au maki.

📖 *E tataua ia Ieremia 10:23; Roma 9:17.*

Tei tuke, te puapingaia ra te au tangata tei ariki i ta te Atua tutaraanga, kare ra i ta te tangata. (Isaia 48:17, 18) Kare e roa atu, ka takore a lehova i te au kavamani katoatoa a te tangata. Te aronga ua tei iki kia akaaereia e te Atua te ka noo i te enua nei. —Isaia 11:9. 📖 *E tataua ia Daniela 2:44.*

4. Eaa ta te tu akakoromaki o te Atua e akatika ra ia tatou kia rave?

Kua karanga a Satani e kare rava e tangata e tavini ia lehova ma te inangaro tika tikai. Ka inangaro ainei koe i te akapapu e kare te reira e tika ana? Ka rauka ia koe! Te akatika ra te tu akakoromaki o te Atua ia tatou katoatoa kia akaari mai me te inangaro ra tatou kia akaaereia tatou e te Atua me kore e te tangata. Ka akaari tatou i ta tatou ikianga na roto i to tatou tu oraanga.

📖 *E tataua ia Iobu 1:8-12; Maseli 27:11.*

5. Akapeea tatou me iki i te Atua ei Tutara no tatou?

Ka iki tatou i te Atua ei Tutara no tatou na te rave anga i te akamorianga mou kia tau ki te Tuatua a te Atua, te Pipiria. (Ioane 4:23) Ka rauka ia tatou i te kopae ia Satani ei tutara no tatou na te akaatea mai anga mei te au angaanga porotiki e te tamaki, mei ta Iesu rai i rave. 📖 *E tataua ia Ioane 17:14.*

Te taangaanga ra a Satani i tona mana ei akatupuanga i te au tu tau kore e te au peu kino. Me patoi tatou i taua au peu ra, ka aviri me kore ka kopae tetai au oa e tetai o te au kopu tangata ia tatou. (1 Petero 4:3, 4) No reira e ikianga ta tatou ka rave. Ka piri atu ainei tatou ki te aronga te inangaro ra i te Atua? Ka akarongo ainei tatou i tana au ture meitaki tikai e te aroa? Me rave tatou i te reira, te akapapu ra tatou e e pikikaa a Satani te tuatua anga e kare e tangata e akarongo ki te Atua me maata te au taomianga.

📖 *E tataua ia 1 Korinetia 6:9, 10; 15:33.*

Te akapapu maira to te Atua aroa no te au tangata e ka ope te kino e te mamae. Te au tangata e akaari maira e te irinaki ra ratou i teia, ka mataora ratou i te oraanga mutu kore i te enua nei.

📖 *E tataua ia Ioane 3:16.*

Akaari maira ta tatou au ikianga e te inangaro ra tatou i te Atua ei Tutara no tatou




9

Akapeea Toou Pamiri e Mataora Ai?



1. Eaa i puapinga ai te akaipoipo i roto i tetai pamiri mataora?

No ko mai te au tuatua meitaki ia Iehova, te Atua mataora, te inangaro ra i te au pamiri kia mataora. (1 Timoteo 1:11, *NW*) Nana i akatumu mai i te akaipoipo. E e puapinga tikai te akaipoipo kia akamanaia kia mataora te pamiri, no te mea te oronga maira te reira i te turanga tinamou no te utuutu anga i te tamariki. Ka anoanoia te au Kerititiano kia akangateitei i te au ture a te enua no runga i te retita anga i te akaipoipo.


 *E tataua ia Luka 2:1, 4, 5.*

Eaa to te Atua manako i te akaipoipo? Te inangaro ra aia i te reira ei pirianga tinamou i rotopu i tetai tane e te vaine. Te inangaro ra a Iehova i te au tane e te au vaine kia tiratiratu ki tetai e tetai. (Ebera 13:4) E mea riri nana te kopaeanga. (Malaki 2:16) Inara e akatika ana aia i te au Kerititiano kia kopae e kia akaipoipo akaou me akaturi to ratou tokorua.

 *E tataua ia Mataio 19:3-6, 9.*

2. Akapeea te tane e te vaine me akono i tetai e tetai?

Kua anga mai a Iehova i te tane e te vaine kia rave i ta raua tuanga i roto i te akaipoipo. (Genese 2:18) Ei upoko no te pamiri, ka akono te tane i te au mea e anoano ra tona pamiri e kia apii kia ratou no runga i te Atua. Kia akaari aia i te tu akatinga no tona inangaro i tana vaine. Kia inangaro e kia akangateitei te au tane e te au vaine i tetai e tetai. No te mea e tu apa to te au tane e te au vaine, ko te taviri e mataora ai te akaipoipo, kia akakore raua i te ara a tetai e tetai.

 *E tataua ia Ephesia 4:31, 32; 5:22-25, 33; 1 Petero 3:7.*

3. Ka akaruke ainei koe i tetai akaipoipo kare e mataora ana?


Me te kite ra koe i te au turanga ngata i roto i toou akaipoipo, e angaanga kapiti korua kia akono i tetai e tetai ma te aroa. (1 Korinetia 13:4, 5) Kare te Tuatua a te Atua e akamaroi-

roi ana i te akatakake anga ei ravenga no te akatikatika anga i te au manamanata tei matauia i roto i te akaipoipo.

 *E tatau ia 1 Korinetia 7:10-13.*


4. Te au tamariki, eaa ta te Atua e inangaro maira no kotou?


Te inangaro maira a lehoia ia kotou kia mataora. Te oronga maira aia i te tauturu meitaki rava atu e akapeea kotou e mataora ai i to kotou oraanga mapu? Te inangaro maira aia kia puapingaia kotou mei te tu pakari e mei ta to kotou au metua i na roto ana. (Kolosa 3:20) Te inangaro katoa maira a lehoia ia kotou kia mataora i te rave i te au mea no Tei Anga mai ia kotou e no tana Tamaiti.


 *E tatau ia Koheleta 11:9–12:1; Mataio 19:13-15; 21:15, 16.*

5. Te au metua, akapeea ta kotou tamariki e mataora ai?

E angaanga pakari koe kia rauka mai te kai, tetai are, e te kakau no taau tamariki. (1 Timoteo 5:8) Inara, e mataora ei taau tamariki, ka anoano katoaia koe kia apii ia ratou kia inangaro i te Atua e kia apiiia mai e ia. (Ephesia 6:4) Ka riro taau akaraanga i te akaari anga i te inangaro i te Atua ei akakeu anga maata i taau tamaiti. Me akatumu koe i taau apiianga ki runga i te Tuatua a te Atua, ka akatikatika te reira i te manako o taau tamaiti na roto i te tu papu.

 *E tatau ia Deuteronomi 6:4-7; Maseli 22:6.*

Ka puapingaia te au tamariki me akamaroiroi e me akameitaki atu koe ia ratou. Ka anoano katoaia ratou kia akatikatikaia e kia akoia. Ka riro taua au terenianga ei paruru ia ratou mei te au tu kino te ka akamaromaroa ia ratou. (Maseli 22:15) Inara, eiaa te akoanga e kino pakari roa.  *E tatau ia Kolosa 3:21.*


Kua nenei te Au Kite o lehoia i tetai au puka tei tataia ei tauturu i te au metua e te au tamariki. Kua akatumuia teia au puka ki runga i te Pipiria.  *E tatau ia Salamo 19:7, 11.*



Akapeea Koe e Kite ei i te Akamorianga Mou?

1. Okotai ua ainei akonoanga mou?


Kua apii a Iesu okotai ua rai akonoanga ki tana au pipi, ko te akonoanga mou. Mei tetai mataara rai te reira te arataki atura ki te ora mutu kore. Kua akakite a Iesu e: “E tokoia ua ake tei kite atu i te reira” mataara. (Mataio 7:14) Ka ariki ua te Atua i te akamorianga tei akatumuia ki runga i tana Tuatua mou. Te taokotai nei te aronga akamori mou ravarai ki roto i te akarongo okotai.

 E tataua ia Ioane 4:23, 24; 14:6; Ephesia 4:4, 5.

“Kia matakite ra i te peroveta pikikaa.”

—MATAIO 7:15.

2. Eaa ta Iesu i akakite mai no runga i te au Kerititiano pikikaa?

Kua akamatakite mai a Iesu e ka takino te au peroveta pikikaa i te Akonoanga Kerititiano. Me akara koe na vao, mei te aronga akamorianga mou rai ratou. Te karanga ra ta ratou au akonoanga e e Kerititiano ratou. Inara, ka kite atu koe i taua au tu tangata ra. Akapeea ra? Ko te akamorianga mou anake ua te ka akatupu mai i te au Kerititiano mou e ka kite atu koe i to ratou au tu e ta ratou au angaanga.  E tataua ia Mataio 7:13-23.

3. Akapeea koe e kite ei i te aronga akamori mou?

Akamanako ana e rima au akairo taka meitaki:

■ E akangateitei ana te aronga akamori mou i te Pipiria ei Tuatua na te Atua. E tauta ana ratou i te aru i ta te reira au ka-

veinga. No reira e tuke rai te akonoanga mou mei te akonoanga te aru ra i te au manako tangata. (Mataio 15:7-9) E aru rotai ana te aronga akamori mou i ta ratou e apii ra.

 E tataua ia Ioane 17:17; 2 Timoteo 3:16, 17.

“Te karanga nei ratou e kua kite i te Atua; kareka i ta ratou angaanga te uuna nei ratou iaia.”

—TITO 1:16.



■ **E akangateitei ana te au pipi mou a lesu i te ingoa o te Atua, ko Iehova.** Kua akangateitei a lesu i te ingoa o te Atua na te akakitekite aere anga i te reira. Kua tauturu aia i te au tangata kia kite i te Atua e kua apii aia ia ratou kia pure e kia akatapuaia te ingoa o te Atua. (Mataio 6:9) Ko teea akonoanga te akakitekite ra i te ingoa o te Atua i toou ngai e noo ra koe?

📖 *E tataua ia Ioane 17:26; Roma 10:13, 14.*

■ **E tutu ana te au Kerititiano mou i te Patireia o te Atua.** Kua tono te Atua ia lesu kia tutu aere i te tuatua meitaki o te Patireia. Ko te Patireia o te Atua te manakonakoanga anake ua o te au tangata. Kua tuatua ua rai a lesu i te reira e mate ua atu ei aia. (Luka 4:43; 8:1; 23:42, 43) Kua tuatua aia e ka tutu aere tana au pipi i te reira. Me tuatua mai tetai tangata i te Patireia o te Atua kia koe, no roto mai aia i teea akonoanga? 📖 *E tataua ia Mataio 24:14.*

■ **Kare te au pipi a lesu e piri ana ki roto i teia ao kino.** Ka kite koe ia ratou no te mea kare ratou e piri ana ki roto i te au angaanga porotiki me kore te au manamanata o te au tangata. (Ioane 17:16; 18:36) Kare katoa ratou e rave ana i te au peu e te au tu kino o teiane ai ao. 📖 *E tataua ia Iakobo 4:4.*

■ **E aroa takake to te au Kerititiano mou no tetai e tetai.** Kua apii ratou i te Tuatua a te Atua i te akangateitei i te au iti tangata ravarai. Noatu e turuturu pakari ana te au akonoanga pikikaa i te au tamaki o te pa enua, kare te aronga akamori mou e rave ana i te reira. (Mika 4:1-3) Mari ra, e taangaanga karapii kore ana te au Kerititiano mou i to ratou taime e ta ratou au apinga i te tauturu e te akamaroiroi i tetai ke. 📖 *E tataua ia Ioane 13:34, 35; 1 Ioane 4:20.*

4. Ka rauka ainei ia koe i te akataka i te akonoanga mou?

Ko teea akonoanga te akatumu ra i ta ratou au apiianga ravarai ki runga i te Tuatua a te Atua, te akangateitei ra i te ingoa o te Atua, e te akakitekite ra i te Patireia o te Atua ei manakonakoanga anake ua no te au tangata? Ko teea pupu tangata te akaari ra i te aroa e te patoi ra i te tamaki? Eaa toou manako?

📖 *E tataua ia 1 Ioane 3:10-12.*



Akapeea Tatou e Puapinga ai Mei te au Kaveinga Pipiria?



1. Eaa ra tatou ka anoano ei i tetai aratakianga?

Maata atu te pakari o Tei Anga mai, i to tatou. Ei Metua aroa, te manako maira aia ia tatou. E kare katoa aia i akakoro ana kia akaaere tatou ia tatou uorai. (Ieremia 10:23) Mei te au tamariki rai te anoano ra i te aratakianga a te au metua, te anoano ra tatou katoatoa i te aratakianga a te Atua. (Isaia 48:17, 18) Te oronga maira te au kaveinga Pipiria i te aratakianga, e apinga aroa ia no ko mai i te Atua. 📖 *E tatau ia 2 Timoteo 3:16.*

Te apii maira ta lehova au ture e te au kaveinga i te arataa meitaki rava atu no te oraanga i teiani, e te akaari maira e akapeea e rauka ai ia tatou te tutaki mutu kore a te tuatau ki mua. I te mea e na te Atua i anga mai ia tatou, e mea tau kia akarongo meitaki tatou ki tana aratakianga.

📖 *E tatau ia Salamo 19:7, 11; Apokalupo 4:11.*

2. Eaa te au kaveinga Pipiria?

E au tuatua mou puapinga maata te au kaveinga Pipiria. Tetai tua ra, e taangaangaia ana tetai au ture kia tau ki tetai au turanga. (Deuteronomi 22:8) Kia taangaanga tatou i te manako tau kia marama eaa ta te au ture a te Pipiria e ta au tuatua mou e akakite maira i ta tatou ka rave. (Maseli 2:10-12) Ei akaraanga, te apii maira te Pipiria e e apinga aroa te ora no ko mai i te Atua. Ka tau-turu mai taua kaveinga tau ra ia tatou i te ngai angaanga, i te kainga, e ia tatou e teretere aere ra. E ka tauturu katoa mai te reira ia tatou kia matakite. 📖 *E tatau ia Angaanga 17:28.*

3. Ko teea te nga kaveinga puapinga atu?

E rua nga kaveinga puapinga rava atu ta lesu i tuatua ana. Te akakite maira te kaveinga mua i te akakoroanga tikai o te ora-

anga tangata—kia kite i te Atua, kia inangaro iaia, e kia tavini akarongo mou iaia. Kia akamanakoia teia kaveinga mua i roto i ta tatou au ikianga. (Maseli 3:6) Te aronga

Akapeea te au kaveinga Pipiria te akakeu anga ia tatou kia matakite tikai?—SALAMO 36:9.

e aru ra i teia kaveinga ka rauka mai tetai pirianga oa ki te Atua, te mataora mou, e te oraanga mutu kore.

📖 *E tatau ia Mataio 22:36-38.*

Ka tauturu mai te rua o te kaveinga ia tatou kia rauka tetai pirianga au ki tetai ke. (1 Korinetia 13:4-7) Te o maira te aru anga i te rua o teia kaveinga ki te aru anga i to te Atua tu no te akono anga i te au tangata. 📖 *E tatau ia Mataio 7:12; 22:39, 40.*

4. Akapeea tatou e puapinga ai mei te au kaveinga Pipiria?

Te apii ra te au kaveinga Pipiria i te au pamiri akapeea me taokotaiia e te aroa. (Ephesia 4:32; Kolosa 3:12, 14) Ka paruru katoa te Tuatua a te Atua i te au pamiri na te apii mai anga i tetai atu kaveinga tau—kia vai tinamou ua te akaipoipo.

📖 *E tatau ia Genese 2:24.*

Na te aru anga i te au apiianga a te Pipiria, ka rauka ia tatou i te paruru i to tatou au apinga pae kopapa e te pae manako. Ei akaraanga, e inangaro ana te au pu angaanga i te aronga te aru ra i te au kaveinga Pipiria no te tu tika e te angaanga maroiroi. (Maseli 10:4, 26; Ebera 13:18) Te apii katoa maira te Tuatua a te Atua ia tatou kia mareka ua i te au apinga te anoanoia ra e kia akaperepere atu i te pirianga oa ki te Atua i to te au apinga materia. 📖 *E tatau ia Mataio 6:24, 25, 33; 1 Timoteo 6:8-10.*

Ka paruruia to tatou oraanga kopapa na te aru anga i te au kaveinga Pipiria. (Maseli 14:30; 22:24, 25) Ei akaraanga, te aru anga i ta te Atua ture kia kopae i te kona kava, ka paruruia tatou mei te au maki kino e te au tumatetenga. (Maseli 23:20) Te akatika ra a Iehova kia inu tatou i te kava, kia tau ua ra. (Salamo 104:15; 1 Korinetia 6:10) Ka puapingaia tatou mei te au kaveinga a te Atua na te apii mai anga kia matakite tatou i ta tatou e rave ra e e manako katoa ra. (Salamo 119:97-100) Inara, kare te au Kerititiano mou e akangateitei ua i te au turanga o te Atua kia puapinga ua ratou uaorai. Ka rave ratou i te reira ei akangateitei ia Iehova. 📖 *E tatau ia Mataio 5:14-16.*




12


Akapeea Koe me Akavaitata Atu ki te Atua?




1. Te akarongo maira ainei te Atua i te au pure ravarai?

Te pati maira te Atua i te au tangata ravarai kia akavaitata atu kiaia na roto i te pure. (Salamo 65:2) Inara, kare aia e akarongo mai ana me kore e ariki mai ana i te au pure *ravarai*. Ei akaraanga, kare te au pure a tetai tangata tei takinokino i tana vaine e akarongoia mai. (1 Petero 3:7) Pera katoa, te rave anga te ngati Iseraela i te kino, kare te Atua i akarongo mai ana ki ta ratou pure. Taka ua ra e, e tikaanga ngateitei te pure. Inara, ka ariki mai te Atua i te au pure a te aronga tei rave i te ara kino me tatarara ratou.  E tataua ia Isaia 1:15; 55:7.

2. Akapeea tatou me pure?


E tuanga no ta tatou akamorianga te pure, no reira ka pure anake ua tatou ki Tei Anga mai ia tatou, ko lehova. (Mataio 4:10; 6:9) Pera katoa, no te mea e aronga apa ua tatou, ka pure tatou na roto i te ingoa o Iesu no te mea kua mate aia no ta tatou au ara. (Ioane 14:6) Kare a lehova e inangaro ana ia tatou kia ripiti ua i te au pure tei tamou ngakauia me kore tei tataia. Te inangaro ra aia kia pure tatou mei roto mai i to tatou ngakau.  E tataua ia Mataio 6:7; Philipi 4:6, 7.


Te akarongo katoa maira Tei Anga mai ia tatou i te au pure muteki ua. (1 Samuela 1:12, 13) Te pati maira aia kia pure tatou i te au atianga ravarai, mei te akamataanga e i te openga o te ra, i te tuatau kaikai, e me aro atu tatou i te au manamanata.  E tataua ia Salamo 55:22; Mataio 15:36.

3. Eaa ra te au Kerititiano ka uipa taokotai ei?


Kare i te mea mama i te akavaitata atu ki te Atua, no te mea te noo nei tatou i rotopu i te au tangata kare e irinaki ana i te Atua e te aviri ra i tana taputou no tetai turanga au i te enua nei. (2 Timoteo 3:1, 4; 2 Petero 3:3, 13) No reira tatou ka ano-



ano ei i te kapitianga akamaroiroianga o te au taeake irinaki e te anoano maira ratou ia tatou.  *E tataua ia Ebera 10:24, 25.*

Te kapitianga ki te au tangata tei inangaro i te Atua, ka riro ei tauturu ia tatou kia akavaitata atu ki te Atua. E atianga meitaki tikai te au uipaanga a te Au Kite o Iehova kia akamaroiroiia mai e te akarongo o etai ke.  *E tataua ia Roma 1:11, 12.*

4. Akapeea koe me akavaitata atu ki te Atua?


Ka rauka ia koe i te akavaitata atu kia Iehova na te akamanako oonu anga i taau i apii mai mei tana Tuatua. Akamanako ana i tana au angaanga, tana akoanga, e tana au taputou. Te tauturu maira te pure e te akamanako oonu anga ia tatou kia marama tikai i te puapinga o to te Atua aroa e te pakari.  *E tataua ia Iosua 1:8; Salamo 1:1-3.*

Ka rauka ia koe i te akavaitata atu ki te Atua me irinaki koe iaia e me tuku koe i toou akarongo ki roto iaia. Inara mei tetai ua rakau rai te akarongo te anoanoia ra kia angaiia. E mea tau kia angai putuputu koe i toou akarongo na te akamanako anga i te tumu o toou irinakianga.

 *E tataua ia Mataio 4:4; Ebera 11:1, 6.*

5. Akapeea koe e puapinga ai me akavaitata atu ki te Atua?

Te manako maira a Iehova i te aronga e inangaro ra iaia. Ka paruru aia ia ratou mei tetai au mea te ka takino i to ratou akarongo e to ratou manakonakoanga no te ora mutu kore. (Salamo 91:1, 2, 7-10) Te akamatakite maira aia ia tatou no runga i te au mea no te oraanga te ka takino mai i to tatou oraanga kopapa e te tu mataora. Te apii maira a Iehova ia tatou i te arataa meitaki rava atu o te oraanga.

 *E tataua ia Salamo 73:27, 28; Iakobo 4:4, 8.*



13

Eaa te ka Tupu ki te Au Akonoanga?

1. E meitaki ainei te au akonoanga ravarai?

E au tangata ngakau tae tetai i roto i te au akonoanga ravarai. E mea meitaki tikai e te kite maira te Atua i taua au tangata ra e te manako maira aia ia ratou. Mea tangi ra, kua taangaangaia te au akonoanga kia rave i te au mea kino. (2 Korinetia 4:3, 4; 11:13-15) Kua akakite mai tetai au nuti ripoti e kua o katoa atu tetai au akonoanga ki te tamateanga i te au tangata, akapou takiri anga i tetai iti tangata, tamaki, e te takinokino anga i te tamariki. E mea mii tikai teia ki te aronga irinaki ngakau tae i te Atua!

📖 *E tatau ia Mataio 24:3-5, 11, 12.*

Inara te akakaka ra te akonoanga tika i te Atua, e te akamareka kore ra te akonoanga pikikaa iaia. Te apii ra te reira i te au manako kare i roto i te Pipiria, kapiti mai te au apiianga pikikaa no runga i te Atua e tei mate. Inara te inangaro ra a lehova kia kite te au tangata i te tikaanga no runga iaia.

📖 *E tatau ia Koheleta 9:5, 10; 1 Timoteo 2:3-5.*

2. Eaa te ka tupu ki te au akonoanga?

E mea mataora ra, kare te Atua e mareka ana i te au akonoanga tei karanga e te inangaro ra ratou iaia, inara te inangaro tikai ra ratou i to Satani ao. (Iakobo 4:4) Te taiku ra te Tuatua a te Atua i te au akonoanga katoatoa e ko “Babulonia maata.” Ko Babulonia te oire taito i akamata mai ei te akonoanga pikikaa i muri ake i te Vaipuke i to Noa tuatau. Kare e roa atu, ka takore te Atua i te au akonoanga te akavare ra e te takinokino ra i te tangata. 📖 *E tatau ia Apokalupo 17:1, 2, 5, 16, 17; 18:8.*

Inara, kare e ngaropoina ia lehova te au tangata ngakau tae i roto i te au akonoanga pikikaa i te ao katoa. Te taokotai nei aia i taua au tangata ra na te apiianga i te tuatua mou kia ratou.

📖 *E tatau ia Mika 4:2, 5.*



3. Eaa ta te au tangata ngakau tae ka rave?


Te manako maira a lehovala i te au tangata te inangaro ra i te mea tika e te mea meitaki. Kua raurau atu aia ia ratou kia akaruke i te akonoanga pikikaa. Te rave puareinga ra te au tangata e inangaro ra i te Atua i te au tauiainga kia akamareka iaia.

 E tataua ia Apokalupo 18:4.


I te anere mataiti mua, te akarongo anga te au tangata ngakau tae i te tuatua meitaki mei te au apotetoro, kua ariu rekareka mai ratou. Kua apii ratou i tetai tu oraanga ou mei ia lehovala, tetai oraanga mataora atu, e tetai akakoroanga e te manakonakoroanga. Kua riro ratou ei akaraanga meitaki no tatou i teia tuatua no te mea kua akarongo ratou i te tuatua meitaki na te tuku anga ia lehovala na mua i roto i to ratou oraanga.

 E tataua ia 1 Tesalonia 1:8, 9; 2:13.

Te ariki nei a lehovala i te aronga tei akaruke i te akonoanga pikikaa ki roto i tona pamiri ei aronga akamori mou. Me ariki koe i ta lehovala patiainga pumaana, ka rauka ia koe tetai pirianga oa kiaia, tetai pamiri ou e te aroa o te au taeake akamori o lehovala, e te ora mutu kore.

 E tataua ia Mareko 10:29, 30; 2 Korinetia 6:17, 18.

4. Akapeea te Atua me oronga mai i te mataora ki te au enua ravarai?

E nuti meitaki tikai te akavaanga ka tupu ki te akonoanga pikikaa. Ka takoreia te takinokino anga i te ao katoa. Kare rava te akonoanga pikikaa e akavare e e akatakake akaou i te tangata. Ka taokotaiia te katoatoa e ora ra kia akamori i te Atua mou anake.  E tataua ia Apokalupo 18:20, 21; 21:3, 4.

Taokotai nei te akonoanga tika i te tangata




14


Eaa ra te Atua i Akanoo ei i Tetai Akaaerenga?



1. Eaa ra te Atua i iki ei i te ngati Iseraela ei iti tangata nona?

Kua iki te Atua i te uanga a te pateriareka ko Aberahama ei iti tangata nona e kua oronga i tetai au ture kia ratou. Kua kapiki aia i teia iti tangata e ko “Iseraela” e ko ratou tei aru i te akamorianga mou e tei akono i tana tuatua. (Salamo 147:19, 20) No reira ka akameitakiia te au tangata ravarai o te pa enua na roto ia Iseraela.  E tatau ia *Genese 22:18*.


Kua iki katoa te Atua i te ngati Iseraela ei au kite nona. Te akapapu maira to ratou papaanga taito e akapeea te au tangata e puapinga ai me akarongo ratou ki te au ture a te Atua. (Deuteronomi 4:6) No reira, na roto i te apii anga no runga i te ngati Iseraela, ka kite mai tetai ke i te Atua mou.

 E tatau ia *Isaia 43:10, 12*.


2. Eaa ra te au Kerititiano mou i akanooia ai?

Aere ua rai, kua ngere to Iseraela i ta te Atua akaperepereanga, e kua mono a lehova i taua iti tangata ra ki te putuputunga Kerititiano. (Mataio 21:43; 23:37, 38) Te mono nei te au Kerititiano mou i te ngati Iseraela ei au kite no lehova.


 E tatau ia *Angaanga 15:14, 17*.

Kua akaaere a lesu i tana au pipi kia tutu aere e kia akariro i to te pa enua katoa ei pipi. (Mataio 10:7, 11; 24:14; 28:19, 20) Te vaitata nei teia angaanga ki te openga o teia akatereanga. Ka tai nei taime i roto i te tuatua enua i taokotai mai ei a lehova i te au mirioni tangata mei te pa enua katoa ki te akamorianga mou. (Apokalupo 7:9, 10) Kua akanooia te au Kerititiano mou kia akamaroiroi e kia tauturu i tetai e tetai. Aiteite ua ta ratou porokaramu no te apii Pipiria i ko i ta ratou au uipaanga i te ao katoa.  E tatau ia *Ebera 10:24, 25*.


3. Akapeea te akaaerenga o te Au Kite o Iehova i teia tuatau te akamataanga?

I te au mataiti o te 1870, kua kite akaouia mai e tetai pupu meangiti o te aronga apii Pipiria te au tuatua mou Pipiria kua roa te tuatau te ngaro anga. Kua kite ratou e kua akaaere ana a Iesu i te putuputuanga Kerititiano kia tutu aere, no reira kua rave ratou i tetai kamupeini tutuanga i te Patireia i te ao katoa. I te mataiti 1931 kua ariki ratou i te ingoa, te Au Kite o Iehova.  E tatau ia Angaanga 1:8; 2:1, 4; 5:42.

4. Akapeea te Au Kite o Iehova te akaaereia anga?

I te anere mataiti mua, kua puapingaia te au putuputuanga Kerititiano i te au enua e manganui mei te aratakianga a tetai pupu akaaere tei ariki e, ko Iesu te Upoko o te putuputuanga. (Angaanga 16:4, 5) Te puapinga katoaia ra te Au Kite o Iehova i te ao katoa i teia tuatau mei te Pupu Akaaere o te aronga pakari tukatau. Na te reira e akaaere ana i te au opati manga o te Au Kite o Iehova e rave ra i te urianga, neneianga, e te tua anga i te au puka apii Pipiria i roto i tetai au 600 reo. No reira ka rauka i te Pupu Akaaere i te oronga i te akamaroiroia e te aratakianga Tuatua Tapu no tetai au 100,000 putuputuanga i te ao katoa. I roto i te putuputuanga tataki tai, te tavini ra te au tane tukatau ei aronga pakari me kore ei au akaaere. E akono ana teia au taeake i te anana a te Atua ma te aroa takinga meitaki.  E tatau ia 1 Petero 5:2, 3.

Kua akaaereia te Au Kite o Iehova kia tutu aere i te tuatua meitaki e kia akariro i te tangata ei pipi. Mei te au apotetoro rai, e tutu aere ana matou mei tera are ki tera are. (Angaanga 20:20) E apii katoa ana matou i te Pipiria ki te aronga te inangaro tikai ra i te tuatua mou. Inara kare matou te Au Kite o Iehova i te akaaerenga ua, e pamiri matou e e Metua aroa to matou. E au taeake e e au tuaine matou te manako ra i tetai tetai. (2 Tesalonia 1:3) I te mea e kua akaaereia te iti tangata o Iehova kia akamareka i te Atua e kia tauturu i tetai ke, ko ratou te pamiri mataora rava atu i te enua nei.

 E tatau ia Salamo 33:12; Angaanga 20:35.



No tetai akakiteanga maata atu, akara i te pene 19 o te puka Eaa ta te Pipiria ka Apii Mai ia Tatou?

Eaa ra Koe ka Apii ua Atua Ei?



1. Akapeea ra koe e puapinga ai me apii ua atu koe i te Pipiria?

Kare ekoko e kua akaketaketaia toou inangaro no lehova na te akara akaou anga i teia au apiianga puapinga o te Pipiria. Te ano-anoia ra kia akaketaketa ua atu koe i teia inangaro. (1 Petero 2:2) Ka rauka toou manakonakoanga no te ora mutu kore me akavai-tata atu koe ki te Atua na te apiianga i tana Tuatua.

📖 *E tataua ia Ioane 17:3; Iuda 21.*

E maata maira toou kite i te Atua, ka ketaketa atu toou akarongo. Ka riro te akarongo ei tauturu ia koe kia akamareka i te Atua. (Ebera 11:1, 6) Ka akakeu te reira ia koe kia tataraara e kia rave i te au tauia puapinga i roto i toou oraanga.

📖 *E tataua ia Angaanga 3:19.*

2. Akapeea tetai ke e puapinga ai mei taau i kite mai no runga i te Atua?

Tei matauia, ka inangaro koe i te akakite ki tetai ke i taau i apii mai—e mataora ana tatou katoatoa i te akakitekite aere i te nuti meitaki. Ia koe e apii ua atu ra i te Pipiria, ka kite mai koe i te ta-angaanga i te Pipiria ei akamarama anga i toou irinaki no lehova e te tuatua meitaki. 📖 *E tataua ia Roma 10:13-15.*

Maataanga o te au tangata ka akakite ratou i te nuti meitaki na mua ki te au oa, me kore ki te kopu tangata. Kia tau ra te tua-tua anga. Eiaa e karanga kia ratou e tarevake ra ta ratou akono-anga, e akakite ra i ta te Atua au taputou kia ratou. Kia maara katoa e ka mareka mai te au tangata i toou tu maru, kare ra i taau i tuatua ana. 📖 *E tataua ia 2 Timoteo 2:24, 25.*

3. Eaa te pirianga ki te Atua taau ka mataora?

Ka riro te apiianga i te Tuatua a te Atua i te tauturu ia koe kia tupu i te pae vaerua. I te openga iora, ka o atu koe ki roto i tetai pirianga puapinga tikai kia lehova. Ka riro koe ei mema no tona pamiri. 📖 *E tataua ia 2 Korinetia 6:18.*

Ka o atu koe ki roto
i tetai pirianga pu-
apinga kia lehova



4. Akapeea koe e tere ua ai ki mua?

Ka tere koe ki mua i te pae vaerua na te apii ua atu anga i te Tuatua a te Atua. (Ebera 5:13, 14) E pati ki tetai o te Au Kite o lehova kia apii korua i te Pipiria, na te apii anga i te puka *Eaa ta te Pipiria ka Apii Mai ia Tatou?* Te maata atu taau ka kite mai mei te Tuatua a te Atua, ka puapinga maata atu toou oraanga.

 E tatau ia Salamo 1:1-3; 73:27, 28.

No ko mai ia lehova, te Atua mataora, te nuti meitaki. Ka rauka ia koe i te akavaitata atu kiaia na te akavaitata anga ki tona iti tangata. (Ebera 10:24, 25) Na roto i taau tauta anga i te akamareka ia lehova, te iki ra koe i te ora tika tikai—te ora mutu kore. Te akavaitata anga ki te Atua, ko te mea meitaki rava atuia noou.

 E tatau ia 1 Timoteo 1:11; 6:19.

Eaa ta te Pipiria
ka Apii Mai
ia Tatou?



Ka rauka ia koe
teia puka e tei runga
teia i te Initaneti,
www.jw.org
i roto i te
au anere reo

KO TEEA TUMU
TUATUA TAAU
E REKA ANA?

1



Eaa ra te
nuti meitaki?

2



Koai ra te Atua?

3



No ko mai tikai
ainei te nuti
meitaki i te Atua?

4



Koai a
Iesu Karaiti?

5




Eaa to te Atua
akakoroanga no te
enua nei?

6



Eaa te
manakonakoanga
no tei mate?

7



Eaa te Patireia
o te Atua?

8



Eaa ra te Atua i
akatika ai i te kino e
te mamea kia tupu?

9



Akapeea toou pamiri
e mataora ai?

10



Akapeea koe e kite ei i
te akamorianga mou?

11



Akapeea tatou e
puapinga ai mei te
au kaveinga Pipiria?

12



Akapeea koe me
akavaitata atu
ki te Atua?

13



Eaa te ka tupu ki te
au akonoanga?

14



Eaa ra te Atua
i akanoo ei i tetai
akaaerenga?

